



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Septem Illustrium Virorum Poemata**

**Amstelodami, 1672**

Ad Flavium Chisium Cardinalem Eminentissimum, in Galliam navigaturum.

**urn:nbn:de:hbz:466:1-11215**

A D  
 FLAVIUM CHISIUM  
 CARDINALEM  
 EMINENTISSIMUM,

*in Galliam navigaturum.*

**L**ux ea, quæ lectum manifesto numine Divûm  
 Jussit ALEXANDRUM nutantia Regna subire,  
 Quantum illi tristis, tantum mihi læta refulsit.  
 Tempus Io, Musæ, choreas, de more, per umbram  
 Ducere Castaliam, Latiique & Phocidos arva  
 Carmine Dircaeo, fidibusque implere canoris.  
 Annua debentur geniali carmina luci,  
 Ingenium vestro quæ fecit & otia Vati:  
 Munera parva quidem; sed & ipsi parva Tonanti  
 Munera dat Pastor, nec Juppiter illa recusat.

Hanc pater ipse diem Phœbus canit ore quotannis:  
 Jamque fides plectrumque parat; sed gaudia differt  
 Nostra Deus, citharamque jubet fervire dolori,  
 Ostendens digito stantes in littore puppes  
 Romuleas, Dominumque meum transferre paratas,  
 Me sine, quæ Rhodanus rapido subit æquora cursu.  
 Ergo omnis mecum digressu mœsta dolensque,  
 FLAVI, Roma tuo, qualis nova nupta remotos  
 Ad Morinos abeunte viro, quem observat amatque  
 Perdita; conqueritur, seque atra in nocte relinqui,  
 Dum Latium tanto viduatur fidere cœlum,  
 Clamat. ALEXANDER lacrimis vix temperat æquis,  
 Quem corde impavido, nec habenti nubila vultu  
 Res magis adversæ, quàm res videre secundæ.

G 5

Quidni

Quidni ego crudeles Divos & fidera dicam,  
 Quæ tua me vetuere sequi vestigia, Princeps?  
 Non tamen, in vacua quod inutilis urbe relinquo,  
 Nec mihi Sequanicas fas est invifere Athenas;  
 Sed tantum doleo, quod pectora nostra, fidemque  
 Æquoreis faltem non experiare periculis.  
 Quamvis, Neptuni imperiis, tibi cæcula Triton  
 Æquora jam sternat: jam Glaucus, amataque Glauco  
 Nereidum Galathæa chori pulcherrima, Opisque,  
 Et formosa Lycorias, & quæ plurima ponti  
 Numina certatim Musis memorantur Achivis,  
 Præsidio accurrant magnæ obsequiofa carinæ:  
 Inter quæ mirata novæ spectacula pompæ  
 It Thetis, Iliacum nunc primum oblita dolorem.  
 Nec minus hinc roseo Zephyrus pede temperat undas;  
 Thracius hinc Boreas glacie exarmatus & imbri  
 Se paribus circum cava lintea librat in alis.

Ergo age, quandoquidem sine me vis ire per altum,  
 I decus Aufoniæ, felicibus utere ventis:  
 Dum flentes reditumque brevem, memoremque rogamus  
 Nostri animum: Longas hac spe solabimur horas.  
 Quod superest, vastum fugientia vela per æquor  
 Albana de rupe oculis, votisque sequemur.  
 Tu quoque verte oculos, & mutua concipe vota.  
 Jamque mari placido, Zephyrisque faventibus exit,  
 Tyrrenamque Thetin dextrâ secat alite puppis.  
 Occurrit primus fluviorum Marta paternis  
 Auctus aquis, lætoque rates clamore salutat.  
 Hinc regio apparet prisca habitata Graviscis,  
 Et Cereri dilectus ager; scopulosa leguntur  
 Jam tibi, Medicæ parent quæ litora Genti.  
 Scilicet hæc illa est cunctis Gens inclita terris,

Quæ, Mahumethæis ubi Græcia subdidit armis  
Immeritum caput, exulibus fuit hospita Musis,  
Graiaſque invexit Latio quas noverat artes.  
Multa vides noſcenda ævi monumenta prioris,  
Urbeſque, fluviolque, ſinus, & ab æquore circum  
Undique perſuſas terras: ſed in Hercule fige  
Lumina præfertim, cujus de nomine portus  
Dicitur (hunc olim tenuit GENS CHISIA portum)  
Partem aliquam in Divo laudum inventure tuarum.  
Juppiter haud illum pater & cæleſtis origo  
Tot Jove majorum deducta ab origine Divum;  
Sed caput objectum pulcra pro laude periclis,  
Et domitæ peſtes, & monſtra immania forti  
Viſta manu fecere Deum, cæloque locarunt,  
Servatæque illi poſuere altaria gentes.  
Ante illum multi vixerunt ab Jove nati,  
Qui quòd in amplexu jacuere ignobilis otù,  
Vilia ſectantes, & inertis commoda vitæ;  
Inſleti periſſe ſuis, ævoque nepotum  
Ignoti, nomenque tegit quod & oſſa ſepulchrum.  
En tibi (ſenſit enim Deus adventare carinas)  
Lætus adeſt celiſ elatus cornibus Umbro,  
Per medioſque viam fluctus ſibi pandit ad alnum  
Quâ veheris, multis inopina ob gaudia vultum  
Perfuſus lacrimis. Tibi donat agreſtia poma,  
Te cupit amplecti, te carum dicit Alumnum:  
Litus & ad patrium, claramque invitât ad urbem:  
Invitant, feſtâque caput tibi fronde coronant  
Fluminis herboſo ſtantes in margine Nymphæ.  
Omnia quæ cernens obliquo lumine Tybris  
Triftatur, gelidaſque metu jam contrahit undas.  
Apparent longè pendentia Macereti

Ru-

Rudera, fonte locus medicarum notus aquarum,  
Atque alia has circa terras prisca Oppida & Arces,  
Quas Atavi tenuere tui. Sic omnia passim  
Tempus & assidui versant mortalia casus.  
Classis abit, verritque salum, quà se pede lento  
In mare fert Alma exiguis inglorius undis.  
Mox Lynceus subit, & ferri gravis Ilva metallis,  
Et celebrata diu Tuscis Populonia factis.  
Unde autem exoritur subito tam festus in auras  
Clamor? qui radiant ignes? quæ murmura læta  
Excipiunt venientem, & amica tonitrua classem?  
Portus adest (nostri nuper dixere Liburnum)  
Puppibus Hesperis, & velis notus Eois,  
Conditæ ubi servantur opes, quas utraque mittit  
India, quas & Arabs, quas messibus Africa dives,  
Et quæ Getulo veniunt de littore merces.  
Venimus interea, citò vela ferentibus Euris,  
Quà consanguineus Tiberi, nec degener Arnus  
In mare se Tuscum spumantibus invehit undis:  
Arnus opum dives, centum pater Arnus Olorum,  
Quorum Itali cantum, gressumque sequuntur Olores.  
Haud procul hinc Lucæ veniens de finibus Anxur  
Olim Arno miscebat aquas; nunc solus in æquor  
Lapsus ad extremas sua nomina servat arenas.  
Hinc & Sardinia tractus pallentis, & ingens  
Corsica prospicitur, tantorum causa laborum:  
Et conjuratæ quondam pervertere Pisas  
Amne superfuso Capraria, parvaque Gorgon,  
Quæ fuit Æthiopum extremis in finibus una  
Gorgonidum Euryale, fato huc delata maligno,  
Inque maris scopulum cognatis versa colubris.  
Namque ferunt, postquam fatali messuit ense

Victor Abantiades caput exitiale Medusæ ;  
Euryalen caræ mœrentem cæde fororis  
Deseruisse locum. Sed jam ratis ostia Macræ  
Præterit. Alta vides Lunæ monumenta vetustæ ,  
Nec procul albenti secundum marmore montem,  
Quo dives Pietas Divûm sæpe imbuit aras,  
Vel levis Ambitio Regales excitat ædes.  
Invitat fessas longo discrimine proras  
Lunæ olim dictus, Veneris nunc nomine portus,  
Delitiæ Nerei , statio fidissima nautis.  
Tu tamen ire jubes, ventosque urgere faventes :  
Jamque aperit sese Ligurum clarissima tellus,  
Hellepontiaco quondam dominata profundo,  
Quantum frugis inops, tantum auro opulenta virisque.  
Assurgit, sterilique jugo prætenditur undis  
Horribilis visu rupes, quanquam arte magistrâ  
Culturæ patiens, & amabilis ora Lyæo :  
Quam prætervectus venies, ubi surgit, & amplo  
Excipiet te læta sinu Tigulina Segesta ;  
Dehinc rutilas volvens Entella ad litus arenas ;  
Nec longè portum Delphini intrare licebit.  
Alliciet vultu regio Te culta benigno,  
Suadebitque rates lento suspendere remo ;  
Quippe ibi perpetuo scabras mirabere cautes  
Vere tegi, & litus peregrinis fertile glebis.  
Tu cave Sirenum infidias : fuge puppe citatâ  
Dîs orbum pelagus, & litora surda carinis.  
Et jam Porciferæ parvum pervenimus amnem :  
Jam Merulam, fluviosque alios, quos dicere longum est,  
Apennini omnes gelidis de rupibus ortos,  
Omnes auriferâ redimitos tempora citro,  
Plurima quæ passim formosis confita ripis

Fra-

Fragrantem latè pelago diffundit odorem.  
 Sed vento tua prora volans, vento ocyor ipso  
 Mauritii portum superat, portumque Monæci,  
 Quos raptim refero, quia classem imitamur euntem,  
 Quæque rapit naves, nostram rapit aura Camœnam.  
 Jam mare decursum est Ligurum, jam panditur oræ  
 Terminus Italicæ Varus, quem rura sequuntur  
 Gallica, nimbiferis demissus ab Alpibus amnis.  
 Stechadas interea velox post terga reliquit,  
 Ac Te Massiliæ, FLAVI, ratis appulit arvis.  
 Nunc rapidis invecus equis ad mœnia perges  
 Regia, quæ vitreo partitur Sequana fluctu:  
 Læto ubi Te vultu excipiet Rex inclytus armis,  
 Qui formidatum Turcis accingitur ensẽm,  
 Et fatis aperire viam cessantibus audet:  
 Dum face, dum ferro latè Serinius hostem  
 Insequitur victor, Pietatis & ultor Avorum,  
 Perque volat cædes, & ad altum fulminat Istrum,  
 Salve Heros invicte animis, tutela ruentis  
 Pannoniæ, Dux famâ ingens, ingentior armis.  
 Relligio tibi se lugens commendat, & omnis  
 Europæ, Vir magne, tuâ spes nititur hastâ.  
 Tempus erit, cum te spoliis Orientis onusto,  
 Solvet ALEXANDER votum, fractasque superbas  
 Cernet opes Asiæ, debellatumque Tyrannum.  
 Tunc te sudore illustrem, multoque decorum  
 Pulvere, clarus aquis, sed famâ clarior amnis  
 Jordanis, cedrique ferax Carmelus, & Hermon  
 Palmifer excipient, lymphâque umbrâque recenti.  
 Te Tanaïm quicumque bibunt, te Caspia Regna  
 Victorem, ditisque colent septem ostia Nili,  
 Et tibi prædatrix marium dabit Africa pœnas.

Interea duris solvetur Græcia vinclis.  
 At Divæ bifidi cultrices montis, & ipse  
 Turpi à servitio tandem, te vindice, liber  
 Parnassus merito reddet tibi carmine grates.

A D

## MATTHIAM NALDUM

S. D. N.

*Medicum, & Cubicularium intimum.**Ex lectulo.*

**N**Alde, peregrinis famâ jam cognite terris,  
 Quem Phœbus pater eximio complexus amore  
 Edocuit citharæque modos, artemque medendi:  
 Fare age quî valeant herbarum tollere succi,  
 Vel saltem lenire sitim ægrotantis amici,  
 Quam mihi per cunctas paulatim didita fibras  
 Ossibus implicuit nuper febricula ficcis;  
 Ut sive Eoo nos Lucifer axe revisit,  
 Seu convexa rubens accendit sidera Vesper;  
 Irrequietus agar majori percitus cæstro;  
 Quàm quod Apollinæ spirat cortina Sibyllæ.  
 Ergo si quis aquæ frigens mihi rivulus olim  
 Vifus ab aërio clivo descendere: siquis  
 Muscum inter viridem gelido manare sub antro,  
 Perque cavam leni vallem manare susurro:  
 Quicumque infano fons fornice ductus in urbem  
 Mole super tereti peregrinas explicat undas,  
 Aut vulgo ignotus secretos irrigat hortos;  
 Scilicet ille mihi semper se rivulus offert,

Illius